

Hainbat sektoretako pertsonen bat egin dute AEKren leloarekin

Euskarari, hitzez zein ekintzez, bai esateko eskatu dute

Euskal gizarteko hainbat sektoretako pertsonen euren babesa eskaini zioten atzo Alfabetatze Euskalduntze Koordinakundeak (AEK) hasi duen matrikulazio kanpainari. AEK-ren Bilboko egoitzan buruturiko ekitaldi honetan, euskarari bai esateko gonbita egin zuten zenbait pertsonen, besteak beste, Xabier Euzkitzek, Rafa Diezek, Jose Elorrietak, Pello Zubiriak eta Patxi Uribarrenek.



AEKri babesa agertu diotenak, atzoko agerraldia hasi aurretik.

XOUSE SIMAL

Aritz Markaida / Bilbo

Ekitaldia Iñaki Lasak aurkeztu zuen, Nafarroako AEKren arduradunak. Lehenik eta behin eskerrak eman zizkien bertara hurbildu ziren lagunei, han egoiteko, zeregin ugari eta garrantzitsuak utzi zituztelako. AEKren Bai euskarari! kanpainarekin bat egiteko, euskal gizarteko hainbat arlotako pertsona ugari hurbildu ziren koordinakundearen Bilboko egoitzara: Xabier Euzkitze bertsolari eta ETBko kazetaria, Elena Etxalar Nafarroako AEKren arduradun ohia, Jose Elorrieta eta Rafa Diez ELAko eta LABeko idazkari nagusiak, Patxi Uribarren idazlea eta euskaltzain urgazlea, Joxe Morales itzultzailea, Pello Zubiria Argiako zuzendaria, Oihane Enbeita bertsolaria, Pilare Baraiazarra normal-kuntzarako euskara teknikaria, Alfredo Elorza botikaria, Luis Baraiazarra eta Andolin Eguzkitza idazleak, Ziortza Sarrionandia boleibol jokalaria, Ana Izagurre Bizkaiko Ikastetxeetako Guraso Elkarteko burua, Iñaki

Izagirre Hezkuntza eta Kultura Zerbitzuetarako Erakunde burua, eta Jürgen Lange irakasle alemaniarra.

Ilusioa zabalduz • Atzoko ekitaldian, ordea, AEK-k hitza eman zien bertara hurbildutako lagunei; guztien izenean, Xabier Euzkitzek eta Elena Etxalarrek hartu zuten hitza. Xabier Euzkitze bertsolari eta ETBko kazetariarentzat, pozgarria izateaz gain, beharrezkoa ere bada «hainbat eraso basati eta zentzugabe» jasan behar izan dituen AEKri babesa ematea.

Berak zorte izugarria duela adierazi zuen, bere jatorrizko hizkuntzan lan egiteko posibilitatea izan duelako. «Nik jendea ilusionatu egin nahi nuke, euskararen edertasunaz jabetu daitezen saiatu behar dugu denok. Euskaraz ongi irakatsiko dien AEK bezalako talde bat inguruan edukitea zorte handia da, eta horretaz jabetu eta ilusioz betetzen saiatu behar genuke guztio», adierazi zuen. Euzkitzek nabarmendu zuenez, AEK-k irakasten

jarraitu behar du, ez dakitenek ikasten saiatu behar dute, eta dakigunok dakiguna landu behar dugu.

Elena Etxalar euskaldunberria da, eta Nafarroako AEKren arduradun ohia. Aurtengo matrikulazio kanpainarako AEK-k haututako lemaekin guztiz bat egiten duela esan zuen, eta guztiak gonbidatu zituen euskarari bai esatera. Elena Etxalarren hitzetan, «euskara herri nortasunaren adierazle izateaz gain, elementu bereizle eta bateratzailea ere bada». Euskara ikasteko motibazio eta arrazoi asko daudela esan zuen: hizkuntza sentitzen dugulako, lagunekin hitz egiteko, lanerako, etabar. «Euskararen mundura hurbildu ez direnei esan nahi diet benetan merezi duela euskaraz bizitzea eta euskaldun izatea; orain, gainera, aukera ederra dago, AEK edozein lekutan baitago mota guztietako ikastaroak eskaintzen eta etengabe ikasketa prozesuak errazteko ahaleginak egiten», gehitu zuen Nafarroako AEKren arduradun ohia. X

Iruñean ez dago ofizioko abokatu euskaldunik

■ Zerbitzu horretarako inork ez du izenik eman

Erredakzioa / Iruñea

IRUÑEKO Abokatuen Elkargotan ofizioko abokatu euskaldunen zerbitzurik ez dela izanen salatu du Iruñerriko Euskal Herrian Euskaraz taldeak (EHE). Horren ondorioz, atxilotuek ez dute izango dohaineko euskarazko laguntza juridikoa izateko aukerarik. Hain zuzen, Euskal Herrian Euskaraz taldeak igaro martxoan ofizioko abokatu euskaldunen gabezia zela eta, eskaera egin zion Abokatuen Elkargoari; honek aintzat hartu zuen eskaera, eta zerbitzu hori euskaraz emateko prestatuak dauden abokatuei izena emateko eskatu zien.

Ofizioko zerbitzua gazteleraz emateko hainbat abokatuk izena eman duten arren, bakar bat ere ez da prest azaldu lan hori bera euskaraz egiteko. EHEren ustez, egoera hori tamalgarria da, euskaldunen eskubideak ez baitira zainduko profesionalen faltagatik.

«Askotan eztabaidatzen da euskara aurrera egiten ari den edo ez. Agian, bai. Baina egoe-

raren diagnosi zuzena egiteko hutsune nabarmenak atzeman behar dira, egoera gordina azaleratu arren; hutsune nabarmen horietako bat da Abokatuen Elkargoaren baitan sumatutakoa», salatzen du EHEk.

Euskaldunen eskubideen gabeziak luzaro iraun dezakeela uste dute EHEko partaideek. Eta egoera horren arrazoietakoa bat da, haien ustez, Nafarroako Unibertsitate Publikoan Zuzenbide ikasketa euskaraz egin ezina. «Profesionalak unibertsitatean prestatzen dira. Profesional euskaldunak euskarazko adarretan», diote.

Horregatik, EHEk Nafarroako Unibertsitatean euskararen normalizaziorako plana noiz helduko den galdetzen du. «Noiz eraginen dugu euskaldunok Errektore aldeketa? Garbi baitago gaurko Errektorearekin eta bere taldearekin euskaldunonak egin duela», gaineratzen dute. EHEk adierazi zuen halaber, euskarari alor guztietan atea ireki asmoz segituko duela. X

Kontseiluak 'Bai euskarari' kanpainarekin jarraitzen du

■ Durango, Otsagi, Zarautz eta Arrasaten, gaur

Erredakzioa / Iruñea

EUSKARAREN gizarte erakundeen Kontseiluak gizarte eragileen indarrak bildu eta gure hizkuntzaren etorkizuna bermatuko duen akordio zabala bultzatuko du. Bai euskarari leloa izango duen kanpainarekin jarri da abian asmo handi hori. Herrietan kanpaina bideratzea eskatuko zaie, diseinua itxi aurretik aurkeztu nahi zaie, ekarpenak egiteko aukera izan dezaten. Hori lortzeko bidean, Kontseiluak jada zenbait aurkezpen egin ditu, eta gaur eta bihar ere izango dira kanpainaren azalpenak, hain zuzen, Arrasate, Durango, Otsagi, Zarautz eta Tuteran.

Arrasaten gaur egingo da bilkura AEKko egoitzan, arratsaldeko 20:00etan, eta bertara deitu dituzte Bergara, Eskoria-tza, Aretxabaleta, Antzuola, Elgeta, Oñati eta Arrasate.

Durango ere gaur izango da bilkura arratsaldeko 20:00etan Gurutzia ikastolan. Elorrio, Zornotza, Berriz, Zaldibar, Mallabia eta Durango deitu dituzte. Otsagin ere gaur bilduko dira arratsaldeko 20:00etan, Gartzet elkarteak, Aezkoa, Zaraitzu, Kantotzaldea, Agoitza, Erronkari, Erro Ibarra eta Otsagi.

Zarautzen ere gaur izango da aurkezpena, 19:30etan Salbatoren Mitxelena ikastolan, Getaria, Zumaia, Orio, Aja, Azkoitia, Azpetia eta Zarautz bilduta. Tuteran bihar egingo da, 20:30etan, AEKko egoitzan Herriberako herriak bilduz. X

«Euskadi Información»ek lan taldean idatzitako liburuak, 15eko goizaldean EGIN eta EGIN IRRATIaren itxiera eta ondorengo herri-erantzuna zorrotz eta sutsu kontatuko dizu.

Umerez gainezka, gertakizunen beroan, protagonista beraiek, Euskadi Información egunkaria sortu zen prekaritate eta bapatekotasun berarekin idatzi dute.

Euskadi Información egunkariarekin batera banatuko da Irailaren 25ean ostiralean, 1.000 pezetatan. Adi egon, ez duzu beste aukerarik izango!

